

由庚堂集

由庚堂集卷之二十二

縉雲鄭汝璧邦章甫著

祭文

泰嶽祈年暨 報謝文

今天下稱名山者無如泰岱其能興雲雨而
爲民禦災捍患者莫如泰岱之神卽父老兒
童士女之所奔走而尊事呼號而徼福者亦
無如泰岱之神蓋神之爲靈四嶽莫敢望焉

去歲東土昏墊下民其咨都御史入疆而怪
之豈其域有岱宗而不能爲民祈順成之福
毋亦天災流行卽神偶不能得之歲耶乃父
老子弟日夕拜舞籲祝庶幾有秋以昭神之
貺然自去冬無雪今春少雨土膏未潤三苗
失秀父老子弟寢食之弗遑以爲歲憂都御
史惻然興嗟而心復怪之豈此下民弗弔于
天而神故靳之膚寸之澤耶抑都御史與群

吏之不蔽職而神督過之也夫上帝至仁
閔凶不再卽都御史與吏有辜身當之爾胡
以移之民也今都御史率群吏禱而齋心告
虔于神願及時降之甘澍育此麴麥俾獲有
秋以慰我父老子弟皇皇之望都御史敬與
吏民百拜稽首謝神之大貺而光昭其威德
如其愆期以爲民恫惟神之羞必不其然惟
神鑒之

嗟我東土之民自去秋霖雨爲虐百穀不登
老羸溝壑流移載道徂春益以亢旱二麥就
槁哀我予遺皇皇莫必其生都御史痾瘵廼
身日督藩臬諸司暨郡邑長吏蚤夜拮据爲
家乳人哺計惟是甘澍未霈匪伊人力則率
百執事竭精虔禱于澤于岱宗之靈遂荷
神功出雲膚寸不崇朝雨大霑足俾我來牟
豐艾以昭受上帝明賜遺黎再造四境晏

如逸于西成黍稷稻粱泉麻菽粟之屬亦頗
有秋以克我國賦寧我婦子斯豈不斂一人
敢微鴻貺亦惟是明神大哀於億兆元
元不欲殞絕厥命四冬八蜡咸秩以報厥施
豈以明神興雲雨嘉惠我東人而敢忘嘉
栗肥腍之告近聞諸星史謂金木相凌在虛
危野法應於歲嗟茲瘡痍甫起天其忍復降
割亦惟我明神眷恤以請命上帝俾轉

灾毓祥惠無疆於我億兆時惟

神庥謹告

山東名宦祠祭外祖高密諭樊公文

巖巖秦岱泱泱東海誰其有之尼父萬載誰
其似之維公斯在生而軒軒願學尚志契彼
文莊言師鄒氏得門而入成稅以歸人龍振
譽文苑揚輝唾手一第竟貢賢關木鐸于魯
接武尼山公志日愉曰余瞻孔而教其鄉敢
墜其統識大在人敬業可宗臯比譚易化雨
春風鐵畫錚錚信心而發聲吐爲律書奉爲

灋聖人之徒聖人之邦師嚴道尊化馳道光
義方啓佑胤子登庸浩然歸興仙都空同出
處高標存歿順寧爰秩祀典奠之兩楹翳余
小子言撫大東觀風齊魯拜謁黌宮廟貌巍
峩聲華震疊尚有典刑門人多稟小子髫蒙
公指脉母兒大而門宅相知否今挹公神儼
焉如睹牲醴告虔有懷疇訴高高彼蒼悠悠
我思公乎不朽默相冥趨於戲

福建名宦祠祭高祖邵武府君文

於赫我祖毓秀五雲明經飭履大雅不群師
楊文懿言薰其膏進之老友獎以秋濤天奇
一第貢于賢關白眉振譽志尹希顏牛刀小
試佐政樵川哦松茹蘗卓魯齊肩大獄株起
力批其根公府抗言民以不寃三則成賦舞
文斂手循平事治豐碑萬口九載清風奏最
天子折腰旣慵歸來江浹畏壘有懷扳轅無

托乃畱不曷祠之東岳去思何武種德召公
祀典載秩俎豆贊宮於戲我祖不滿于位而
永其仁榮名千古佑我後人小子不類叨守
閩藩揚芬媿並飲水知源行部式瞻敬薦蘋
藻祖德宗功同彼有昊父老縱觀孫何似祖
敢不滌思無忝我所濯旣降兮中心愴而靈
如在今相此顯恩

祭耿恭簡公文

祠在畱都

維公天予先覺學本誠身生機匪強一體者
仁以磨以琢有功有親成智維信剖幻歸真
造士南國桃李芬榮祝公者貌傳公者神余
辱公知三山七閩余從公遊兩方二程式瞻
祠宇聽睹如新示我周行遐不作人于以薦
公澗沚溪蘋于以見公月白風清

祭楊方湖座師文

憶惟 穆皇之御極兮歲丁卯而龍集比省
士而弓招兮浙髦紛其林立翳雲錦之長鳴
兮需剪拂而後入誰伯樂之一昧兮價千金
而收之媿駑駘之伏櫪兮亦矯首而仰嘶實
洪冶之陶鑄兮幸聽命于吾師旣鹿鳴而作
賓兮與計偕于上國惟公門之賞鑒兮謂南
宮其必獲賈餘勇而先登兮藉桃李之芳澤

時卓魯召對于丹宸兮旋晉陟乎內臺不肖
亦具員于爽鳩兮接鸛斑而徘徊日夕承謦
咳于函丈兮近清切之上台逮繡斧之南巡
兮肆攬轡于中土開湯網以三驅兮披忠讜
于十疏弭玉節而朝天兮慰綢繆乎比部嗟
直道之嶮崎兮倏陳臬而居東詎鸛鸞之鍛
羽兮賦歸去于冥鴻遂丰神之我遠兮欲問
字其焉從曾尺牘之載託兮豈鴻鯉之沉浮

渺余懷之鬱聊兮忽歲月其如流瞻斗杓燦
燦在綠野兮腸日九往乎石頭念不肖方乞
身而遨遊兮得擔簦其走謁先寸楮以紹介
兮戒春明之遠涉胡閭人之未投兮計已聞
而絃絕嗟嗟夫子之朗襟兮吸百川于滄溟
才揮霍而剗犀兮一人雄入于九軍初製錦
于山陰兮歌慈母而稱神君剔中外而樹績
兮僉曰斯人之老成宜扶搖而息六月兮維

蒼生其有深情云胡騎箕尾而上昇兮寧無
恨于冥冥丈人裂而太山頽兮念欲報之其
罔極悵悵江湖之阻脩兮卽奔趨乎靈筵而
未得用涕洟而失聲兮痛已斷乎肝鬲敬忤
詞而遙奠兮悲風慘以淒其采江籬而薦藻
兮悲夜臺之孰知惟結心喪而交令子兮講
百世以爲期

祭康大夫文

嗚呼胡天弗吊而葵哲人胡善弗祿而瘁閒
身朝汎虛舟夕掩重泉豈存者永而造者玄
嗚呼康公嶙嶙九龍琅琅蒼玉孕奇吐葩昂
霄振鵠蜚聲上國佐禮南宮銓卿贊務雅致
英風乃陟豫章瞿瞿公餽豸冠于我冰霜秋
肅言賦歸來飄然拂衣東山蠟屐嘉哉遯肥
五柳扶疎三徑逍遙枕流漱石月夕花朝予

守茲藩令儀寔親閑雲野鶴皂帽綸巾公餘
選勝言笑追陪聽泉朝斗問字仙臺客歲冬
杪予序公詩春仲初日公送我駒臨岐尊酒
徘徊摻袂及予迴車拜公之堂公已伏枕自
牖相望云胡弗起溘焉云亡始聞若夢旣覺
辛傷嗚呼石火電光彭殤何有桑扈返真尻
輪柳肘薪窮火傳公窺其門乘化歸盡何者
足論且也不朽月旦高評鵙鵙籟響山高水

清逝者已矣畱者常新蘭蓀蕙芽接武儒珍
適來適去公何憾焉一晤竟尼予心悁悁薄
寫予衷托此芻醜衷之恫恫公知乎否

祭王太初文

嗚呼王公謂天無意胡畀公以德才之兼謂
天有意胡方見之行而不予公以年豈彼蒼
之不可問而人間世之難於全耶嗚呼哀哉
公之心事朗日青天公之神理寒潭秋水公
之才譎電掣風馳公之文章霞蒸雲起方其
爲諸生時已嶽嶽而稱丈夫迨其宰花封入
青瑣治安萬言白簡片語崢嶸若一柱之擎

天而煌煌乎如鳴鳳之軒翥。典試西川得人
爲盛。中道外遷。出以其正。由蜀入滇。由滇入
粵。羊腸九折。鶴裝一葉。卽九死其未移。又何
有乎萬里之跋涉。帝獨眷乎孤貞。命視學于
中土。轍未停而道南。用旬宣乎齊魯。適不穀
之居東。歲大稔。以告凶。日蒿目而持籌。寔藉
公之勛勩。起溝壑而饘粥之。盖六百萬口。其
雲從洵。惟公之陰隲。豈不穀之敢攘。旣入佐

乎問卿飛天門之八翼、皇界爾以大梁、曰惟
保釐其邁德、公抗章而固辭、視遺榮其若擲、
裴徊乎陪卿之清閒、方北首而奏最、將樞撫
之游膺、夫孰知乎身之不相待耶、嗚呼哀哉、
方輿名嶽遊一已艱、公陟其五、靡勝弗探、掃
片石以揮毫、山川紛其若走、文麗景而神傳、
雲烟生乎郢手、遊草續紛以陸離、光芒上燭
乎牛斗、人雖往而精存、信斯文之不朽、公旣

覽九州而爲隘、必汗漫乎天上之官府、騎箕
尾而比於列星、於以襲維斗之氣、毋矧摩尼
之寂光、超三災而普度、公夙究乎無生、且西
遊而徹悟、亦何恨乎尻輪、咲指玉京而蜩附
畱、未竟之經綸、付令子而武趨、汗血日其干
里、丹穴翩翩乎九苞之彩、雛惟嗟乎國家之
失良臣、吾儕之失良友、慨世道之不淑、能不
長慟而悲走、咽余懷之耿耿、悵宿草之芊芊、

言有盡而衷莫吐身難越而目空懸託楚夢
以告哀惟生芻之一束神洋洋其來歆儷九
原之可作嗚呼哀哉

祭槐樓叔師文

維五雲之續郁兮、鍾靈彩于仙都、先生生而
有此美姱兮、騁逸足于康途、僉謂絕塵而奔
兮、夫何上太行而長呼、蹶霜蹄于歷塊兮、抑
扶搖之六息、僅發跡于明經兮、效脩文而守
一職、羨安定之能造士兮、公門紛其五色、卽
花縣以步武兮、顧興盡而歸與、構草堂于谷
口兮、羌左圖而右書、對靜芳以逍遙兮、問明

月而賦詩、開三逕、過求羊兮、浮大白而歌紫
芝、日涉趣其容與兮、加匕筯而勿藥、聳玉山
之嵬峩兮、何翩翩其矍鑠、睹令子之顓雋兮、
蜚青雲之先聲、矧蘭蓀之兢爽兮、紛玉樹之
英英、謂百年猶未央兮、任持螯而大醕、胡龍
蛇之在辰兮、一旦分夢覺于今昨、緬余小子
之穉椎兮、夙授經于函丈、聆都講于臯皮兮、
生筆花于絳帳、媿雲路之先登兮、歸猶獲奉

乎屨杖愚谷過從而嘯吟兮春風連袂乎鶴
擎迨起家赴白下兮鬱摻袪于郊關謂余將
泛燕子而從汝兮攬佳勝于鍾山敬挈舟以
戒迎兮溯秦淮之潺湲詎星精之忽墜兮竟
長逝而大還嗟老成之凋喪兮誰儀羽乎後
生嘆宗門之寂寥兮酬正色而拄撐卽阿戎
之塊壘兮倚大阮而崢嶸旣安石之先捐兮
將車騎其奚營淒猿鶴而殘松菊兮驚山鬼

而沉客星花月慘而樓臺閔兮雲黯黯而水
泠泠痛殮含之莫視兮卽躬慟而靡能聊寄
哀于楚些兮寫余衷之忼忼靈炯炯其若存
兮知歆格乎混冥

祭李禹門文

嗚呼李公遽止於斯耶其然耶非耶短齡屈
于弱植公生而魁瑰豐下白晢偉然一丈夫
善飫轟飲終歲不一御藥餌昕夕起居亡恙
也而胡遽止於斯耶人生多屯多懼或抑鬱
無聊日損其天而奪之算公系出仙李自少
司寇公垂戡穀大父州守公承之以佑啓尊
人藩幕公簪笏蟬聯而公享有康祉幼而敏

智長而克家入胄而文以世其先翩翩佳公子也仕而丞大官克舉其職擢同知遼州事視篆勤民廉平有幹聲藉甚中丞直指使者數上書薦公遂陟閩都運副使稱大夫至貴適矣夫天畀之亨衢曾不少苦其志而又階之以世胄所不能躋之榮而意大得卽胡福弗介耄期且固有之廼遽止於斯也嗚呼痛哉余辱公講世好以女字其仲子披衷示膈

相得甚驩、愚谷仙都紫芝滄浪時、相與吟嘯
嬉遊、脫然形骸之外、比公入仕、余間相周旋
公大德余、而余謝不任、已亥春、余起家赴白
門、適公入閩、便道過里、握手燕笑、仙仙乎樂
也、亡何別去、悵悵路岐、可一襖所、而公晉楚
藩右史、余寄詩促公來、泛燕磯、牛首作十日
驪、而今已矣、嗚呼痛哉、公年長余一歲、而神
王體胖、故倍余、乃一旦溘焉以逝、其然耶、非

耶余始聞而斷斷不然已而疑又已而痛不知涕之涔涔也雖然公之厚生備矣而復畱思于三晉秩驂驪於五馬不可謂不達矣第令不歸而晝遊里中且覩而歸耳歸而樂親戚情話者累月疾已革而神炯炯書遺命一何周析也有五丈夫子子而孫孫而曾繩繩振振得全而昌公業舍怡于易簣之日矣顧余所恨恨者以公之健履不再假餘年以道

遙于玄都好水間而余又越在千里外不能
與于執手視含之列公臨化遺書于余慙慙
三致意焉余讀而悲悲無已也乃信筆爲詞
佐絮酒酹公公有知耶其格余之衷耶無知
耶而祇以寄吾之哀耶

祭樊明臺文

嗚呼人之榮悴萬幻難齊卽以問天天亦何
期然未有紛紜于今昨若公之變摺于須臾
垂老而不可知者余又安能不捫臆而纏悲
嗚呼痛哉惟公生而爽朗霞舉軒軒茂宰尊
人啓佑公先桂山蔚蔥白眉最賢弱冠聞詩
入闈我浙一第唾手坐而超忽好學不勌延
攬英喆見善則遷升堂百折歲當辛卯名已

入彀而邁數奇、儵焉弗售、時譽翩翩、聽高眎、
天旋貢春宮、司訓海鹽、公當是時、有子肯構、
負郭承驪、仰事孔厚、仲也于飛、矢歌鹿鳴、究
公未竟、用賓于王、振振孫曾、頡頏繼武、公康
于堂、解頤交嬈、取億兆而媿量、如公者、千而
一耳、而酬知乎造物之小兒耶、嗚呼痛哉、公
素善飪、樂不知疲、乃稱矇史、誰銛金鑱、長公
旣逝、仲亦棄捐、返服里居、氣息奄奄、蘭摧蕙

披珠沉玉瘞。獸坐書空悠。悠悠曷語回。視鄉者
之廸康。若九淵之深墜。嗚呼痛哉。人生夢寐。
轉盼層雲。朝歌暮哭。始戚終忻。亦其常爾。曾
何足云。顧如公之憂樂。若一身而兩截。慨往
者之莫追。悲來者之靡輟。雖木石乎。何心將
三嘆而莫歇。嗟百骸兮誰親。卽四大其疇設。
公有健婦情。貳而攜。投艱于昔。力猶可支。老
而桂薑寇。仇相抵。義絕親離。濯髮難紀。此爲

公恨恨不可止。嗚呼痛哉。余辱公知。筆研與
同會。文講業。武林之東。二三知己。脫穎飄蓬。
幸而晤公。含悲握手。公莫余視。余進公酒。牽
裾導席。且喜且惜。云胡斯人而有斯疾。逮余
起家驅車天涯。公執余手。別淚交洟。忽聞公
訃。是耶其非。如公有待。待余且歸。言脩舊好。
相對支頤。乃公何俟。化疑桺。肘隔余萬里。含
視何有。躡踊而哀。公耶何知。惟知余心不忘。

公爾爰筆成些、屢作屢止、作者何窮、止者已
矣、朋友無歸、歸于我所、公尚有子、窀穸宜妥、
生芻寄遠、不入公眼、隴樹離離、春雲慘慘、公
有聞孫、竚承公志、何以酌公、辦香炙絮、公靈
洋洋、格之乎、未嗚呼痛哉

祭萬丘澤文

維公天篤人豪材具文武駿烈則銘著旂常
秣苑則譽標繡虎機鑒沈雄神明精譔落落
心胷軒軒眉宇推赤開誠洞撤城府慕義則
一諾千金吐論則片言千古曩余上谷提兵
幸聯簪組意氣襟期寸心相許接轂連鑣笑
譚尊俎絲肉繽紛引商刻羽抵掌則志激風
雲用壯則氣吞胡虜眎萬落若彈丸指九邊

於掌股余謬評公神鋒豪舉藻溢縹緗玉霏
談塵庶典午之名流振遺風於江左公亟歎
余爲知言真鮑子之知我公尋按節于東遼
余亦建牙於東魯余返初衣雲泥遂阻公業
日恢榮仕日膺經略句麗而夷種虔劉撻伐
龍庭而氏羌卽敘爰簡毗于內臺尋總制于
畿輔方待召于筦樞衍世延于萬戶胡弘施
之未竟乃困頓于二豎撫一紀之易道余復

銜命於西土睇河山之非遙嘽酒壚之莫
覩繹遺言於故縑尋笑端于往緒能不雪涕
興懷承睠涓涓於乎一束生芻糝以椒醕句
注之傍河汾之渚雲旗婀娜有光如炬得非
公之英靈鑒予之微璫也邪

祭曾景默文

於乎遑者陽侯爲虐、河流奔溢、中州滔襄、民
其溝瘠、帝眷南顧、昏墊是蠲、乃命中丞水
土爾職、公亦匪躬、爰諮爰畫、手足胼胝、頰采
羣策、神蔬目蒿、垂底厥績、庶宣房之告成、與
玄圭之是錫、胡陸沈之小康、倏橫流而溯濤、
乃焦勞于四乘、竟殉之以七尺、於乎哀哉、人
之云亡、奈此邦國、惟我與公、投分在昔、同舍

爲郎論心昕夕、出則聯鑣、處則接席、問業譚
文、疑義欣析、余旣叅藩、遂阻南北、公復典禮、
聲華日赫、前後擁三郡之朱轡、卓然爲良二
千石、幸借金華、接壤下邑、山顛水涯、周旋顏
色、尋秉憲於楚秦、見風猷于馭歷、全淞保釐、
聿分岳伯、余載蹶而載起、嘒山川之睽隔、倩
絡繹於郵筒、信交脩而求益、喜將雛于晚年、
羨掌珠之的皪、期臚仕之日躋、展鴻施于亮

弼胡齋志而就冥埋璫枝干窆窆於乎追念
生平襟期肝膈興懷攷血滢滢沾臆萬里走
使絮酒雞炙落月屋梁中宵如覲

祭劉晉川文

唯公喬嶽之標、素絲之節、用盅不盈、淵澄渟
泓、言行可質、諸鬼神、經術紹明於往哲、胡讖
歲于龍蛇、竟芝栴而玉折、緬風義之綢繆、能
不雪涕蘇蘇而承睽也邪、歲維戊辰、南宮釋
褐、公也龍驤、余忝驥末、公方迴翔金馬、著作
之庭、庶幾天祿、石渠之業、已拜夕郎、風動朝
列、尋左轉于雲司、謬左提而右挈、問學相資、

是劇是切、余旣剖符于七閩、遂乞身于巖穴、
公亦秉憲乎三秦、復衡文于兩浙、明月呈彩
乎南溟、竹箭標奇於東越、下國人文於斯爲
烈、提兵紀績于薊門、分陝歌棠于楚滢、三輔
內臺、後先節鉞、爰掌天銓、冰心瑩徹、藻鑑斯
明、鴛鸞區別、紆皇眷以咨嗟、念橫流之蕩
涵、公乃有事於壁薪、不辭雨沐而風櫛、雖黥
瘡而忘勞、唯盡瘁而莫輟、已平成之僞工、信

臣力之已竭、嗚呼、江河湯湯、日月昭揭、偉績
榮名、雖切弗切、遣騎、敕詞、椒漿是設、罔罔寸
心、臨風結悃、

祭王對南相公文

繫恒嶽之峻極兮、竦磅礴而嵒嶒、苞太始之
光精兮、應昌期而降神、爰符靈而受命兮、迺
壹稟於偉人、猗相君之持挺兮、允聖世之祥
璿、端中揆而作輔兮、惟夙夜之亮寅、表獨立
而正色兮、聳巖巖于朝紳、曩儲貳之居震兮、
虛東朝以待謁、恐天意之斐忱兮、悅中外而
艤、琬獨抗疏而昌言兮、凜大臣之風節、去就

以之而弗顧兮、砥中流之巖嶽、壁玉山于萬
尋兮、翔鳳皇于千仞、跂風徽之難攀兮、播朝
野之嘉問、每蒿目于時政兮、信王臣之篤藎、
念重熙之卷懷兮、偃經綸之弘蘊、與台衡之
載秉兮、詔皇圖于昌運、胡騎箕以全歸兮、竟
梁摧而玉璽何玄宰之沕穆兮、乃一老之不
憖曰、余駑下之無良兮、夙附公之後塵、感國
士之特達兮、暖熙臺之如春、傷老成之萎謝、

今念典刑之朱湮遡埃風以陳詞兮托餘哀
于渚蘋神剡剡而若存兮格愔誠于芳馨

祭顧冲菴文

惟公英爽之姿、豪傑之槩、機鑑沉雄、風期慷慨、節烈無愧于古人、義分獨深于交態、若乃定傾救變之略、長馭却慮之謀、指撝吐論、電激星流、是則陶士行劉越石之儔乎、至若右引鑿落、左拈不律、采韻則金石有聲、醉墨而怒猊抉石、顏褚斯足抗衡、淵雲爲之退席、朝提猛士、夜集騷客、是則孔文舉劉穆之之匹、

乎反經制猝熄脫巾之噪功在兩浙張廢振
弛策跳梁之虜勦著九邊去就無動于中信
出處之超然葛巾私第詩筒酒船聖主拊髀
于廉頗蒼生引脰于深源幸得一究其用庶
素抱之足宣胡一疾而入媵御廳輪以僊僊
緬懷夙昔能不涕潛於乎公昔建隼旆枯深
心獨契過我林泉談芝討桂謬以余之顓蒙
謂足當乎重寄中林無容于鑿坏東山未免

乎捉鼻余旣兩出無補于明時深負知己之
是愧於乎辦香束帛遣告總惟公其有知鑒
此涓埃

由庚堂集卷之二十二終

由庚堂集卷之二十三

縉雲鄭汝璧邦章

明倫彙編 家範典 卷之三

奏疏

交代謝恩疏

奏臣先任榆林中路兵巡道陝西按察司
按察使萬曆二十一年四月二十七日
陞授山東布政使司右布政使憑限本
年七月二十九日到任因邊道候代未

離地方續於本年九月初二日准吏部
咨爲缺官事該本部等衙門會題奉

聖旨鄭汝璧陞都察院右僉都御史巡撫山
東等處地方督理營田提督軍務寫勅與
他欽此備咨到臣臣卽望

闕叩頭謝

恩訖臣因山東地方多事星馳赴代於十一
月初九日至省城准原任巡撫山東右

副都御史孫鑛咨送原欽奉嚴處預備
倉糧查閱民兵督發班軍督催薊鎮宣
大糧餉

勅諭四道達字三百八十九號

符驗一道

令旗令牌八面副原掌嘉字三千五百四十
八號巡撫山東關防一顆并吏卷等項
各覲面交代與臣接管行事伏念臣愚

猥以樗材起之草莽未效寸績于西垂
遽叨重寄於東土

恩逾高厚感溢尋常顧當海警之戒嚴兼值
水災之荐至臣旣慙力薄復惕時艱敢
不誓竭愚衷勉圖實濟多方拯恤期齊
民旦夕之安專意修防爲海邦緩急之
備臣下情不勝感戴屏營之至謹具奏

聞

畱班軍防禦疏

題臣據山東按察司呈蒙臣憲牌照得倭
奴盤踞釜山爲謀叵測近該兵部覆奉
欽依不論倭情順逆一意脩備山東三面環
海均當禦防但地方兵力寡弱不足分
布雖經

請調南兵及召募選鋒第主客之勢不同烏
合之衆難馭且民苦災疲軍餉匱拙措

處無策兼之城守乏人尤可深慮查得
所屬衛所官軍原爲捍衛地方後調赴
班軍伍勞困而東省始無兵矣卽今地
方多事班軍應否議復行布政使田疇
按察使夏良心等會議得山東外環滄
海近接倭夷遇汛乘風內犯儵忽以故
國初置衛所設官軍而于青萊登濱海一
帶尤加嚴密蓋專爲地方桑土計也自

正統己巳以後將本省官軍槩調京操
分爲春秋兩班更番入衛迨至嘉靖庚
戌年兵部議奉

欽依于京操官軍內撥修邊牆此京邊班軍
之所由始也本省衛所軍士實在京操
春班五千四百二十八名秋班五千五
百八十九名邊操春班六千名秋班五
千九百九十一名遞相操役歲以爲常

而東省衛所如初兵防非舊矣去歲倭據朝鮮不得已調南兵募選鋒一時若足爲備然兵以遠調則寧處之難衆以烏合則制馭之難重餉無措則供億之難計出權宜事難經久若非議復班軍則衆兵屯聚舍加賦無以資餉當此歲稔民困之日更欲派徵其何以堪況軍在京邊無甚裨于緩急復還本省實有

資于禦防及查沿海地方自宋家口起至塘頭寨環曲二千五百餘里萬一有警南兵募兵六千名耳豈足防禦乞將班軍盡行復還衛所地方庶保無虞伏候裁奪具

題等因呈詳到臣臣議照自倭警以來

寧之所持籌諸臣之所條議俱以山東爲首慮蓋以兵力單弱迥與各處不同前

撫臣孫鑛悉心經畫題

請議復班軍以資守禦一時尚未盡畱臣自
受事日夕拮据力圖振飭凡可徑行不
敢塵瀆惟是病深求艾事多出於權宜
整襟露肘勢苦難于周備新募標兵三
千烏合之衆可練而不可戰③暫調南兵
三千數少力分可戰而不可必勝方今
春汛屆期守禦告急沿海班軍未敢輕

發

請畱仍不容已敬陳其說大端有五惟

陛下垂聽焉夫勢有堅瑕浙直閩廣餉足兵
強戰艦鱗集先年倭多被創必不輕犯
北而遼左巋然重鎮亦稱堅備獨山東
瑕耳倭如狂逞避堅攻瑕山東首當其
鋒沿海二千五百餘里軍城星布王守
無人倭最狡悍來則勢必分犯急破一

城以相恐喝則虛曠之衛所與疲殘之
州邑必不能支而

京師南北騷動矣沿海守禦之軍可無備
乎此當復者一也夫事有本實衛所之
軍

祖宗時原爲防海而設後乃京操而近乃邊
操耳今仍

請海防乃復也非借畱也而京營薊鎮持未

肯還竊所未喻據京營之咨議曰此班軍者派守

京都外城堦口者也夫防護

都城自當周備但虜警多在秋高春月稍爲可緩倭警全在春汛備禦不容少疎今以防汛至急之軍而過爲未然之備且以供他役之用毋乃非

祖宗建置之初意乎薊鎮之咨議曰班軍修

石塘嶺工程及借防草沽等處者也夫
修築邊牆戍卒頗衆安得以防海一日
不可缺之軍以供邊徼不易畢之役重
畚插而忽內衛是不可以已乎至稱草
沽防海則本鎮征調之軍俱已盡還儘
足防禦而猶借山東之軍以克之則山
東防海又將誰借乎舍已而耘人此當
復者二也夫時有緩急兵有衆寡竝急

則當爲寡者謀山東去倭盈盈一水乘風揚帆瞬息可至無川谷疆域之限向者海波稍恬視若少緩故以各軍赴京邊之役今倭據釜山正與海東相對勢盖岌岌矣尚可以昔日視乎夫京營團練之卒以十萬計薊鎮主客之兵亦數倍他鎮蜂屯雲擁似不必借一方之戍卒有如近日科臣之所議者若山東一

省沿海延袤數千里之廣除南兵暫調
外土著不滿萬人惟班軍至二萬餘耳
又舍其所急傾國而役他方譬之家以
已之子弟赴隣之役一旦家有急而借
人之子弟以克此不待智者知其無當
也或謂各邊河南

中都之軍俱衛京薊何獨山東不知邊鎮
主兵動以數萬入衛者遊兵耳河南

中都則俱係腹裏原無海防山東自兩班
遠戍而全齊遂空蓋非各處比矣此當
復者三也夫兵資於餉山東之難增兵
苦於餉也自去歲倭警戒嚴始加賦以
餉新兵民間大蹙聚族而呼曰山東衛
所自有防海舊軍奈何復募兵加餉而
浚我脂膏也今歲重罹水災流離載道
多方救賑之不暇安忍復加徵派以重

其困乎夫以山東之瘠土疲民不及今
爲經久之計復主兵以省客餉而今日
召募明日加徵民力詘而元氣耗臣恐
外警未弭而內憂且亟矣此當復者四
也夫兵貴實用濱海之軍遠役京邊艱
苦萬狀黠者工于影倩窘者瘁于奔勞
鬼狀鵠形烏竄鼠伏尚不堪工作之役
而况操備之實乎若還復衛所汰其老

弱練其精壯復其營田優其月餉餉不加之民而軍不取之客以各衛所之兵爲主守以備倭諸營之兵爲遊擊以標下之兵爲調援土著漸可精練南兵漸可議撤餉損而兵足此久長之策也此當復者五也故議者僉以盡復兩班爲便但恐勢難遽反事在調停以臣愚計京薊之所重者秋防耳春可無往山東

之所急者海防耳腹裏則可往臣

請自今始以濟東充腹裏等衛所盡數仍赴
秋班以青萊登沿海等衛所盡畱本處
防守則在京邊不悞防秋之常期在山
東得修防海之實備在京邊得免行糧
之冗費在山東得省加餉之繁徵在京
邊卽缺數千人不見其爲少在山東得
復數千人實見其加多倭卽馴伏已先

時而備不爲無事而玩愒倭如跳梁則
待勞以逸不爲有事而周章沿海安則
全齊安全齊安則

京師益安是復班軍雖以衛東土亦以固
京師也夫分土而自便臣之所不敢也引
嫌而忽長計臣之所大懼也見在京營
薊鎮當事諸臣皆協衷體

國必能虛心調劑此又臣與地方之所大

幸也僉謀旣同輒敢冒昧以

請伏乞

勅下兵部再加覆議上

請合無將本省沿海春班邊操官軍登州寧
海威海大嵩成山靖海奇山海陽寧津
萊州鰲山靈山雄崖安東諸城膠州十
六衛所共六千名悉免赴班容臣同原
畱秋班京軍簡汰老弱選補精壯分布

沿海防守其腹裏春班京操軍濟南平
山濟寧臨清青州東平滕縣肥城莒州
九衛所共五千四百二十八名改爲秋
班并秋班邊操軍濟南青州肥城臨清
平山濟寧滕縣七衛所共五千九百九
十一名俱於六月內早赴京薊防秋則
庶不失

祖宗設軍防海之初制而亦不盡妨近日調

劑守護之權宜矣謹題請

旨

畱漕銀遼餉賑荒疏

題臣據山東布政使司呈蒙臣案驗近該部科議覆充東災傷欲畱本省漕糧四五萬石平糴緣以改折咨行議處仰司詳加妥議并查萊登災民作何賑濟通詳依蒙行准糧儲道左叅政王士性咨

稱奉兩院明文親歷兗東二府查得兗
州一府并東昌濮州等州縣被水渰沒
困苦已極日食草子樹皮載道徬徨惟
乞官司賑救各州縣倉穀無幾酌量煮
粥放賑尚不足用又無錢糧平糴且平
糴須用見銀極災之民無銀可糴不得
均霑實惠乞另議

請賑濟等因又准分守海右道右叅政沈九

疇海防兵巡道副使徐成位咨稱萊登
海陬民疲今罹重災艱苦益甚棄賣妻
子嗷嗷望賑沿海倉庾蓄積原少加以
防倭諸費搜用一空無從措處查得原
奉經略右侍郎宋應昌劄發馬價銀五
萬兩糴買米豆由海運遼接濟軍需銀
四萬九千六百七兩三錢分發萊登二
府糴過因浮海壞船不敢再運該青州

道僉事王道顯呈奉經略明文停運似
應糶價解還但今災民缺食惟望前米
救濟且明春防海兵衆本處乏米支食
應

請畱賑貧民餘充兵食等因到司爲照山東
地方今歲均被災傷兗州一府與東昌
濮州等處爲甚而萊登二府尤爲重大
五穀不登饑民困憊雖蒙減折漕糧蠲

免存畱糧石窮民尚未得濟見在積貯
無多不穀賑恤人心惶惶別無措處查
得河南江北

題畱漕糧帑金賑救乞將本省漕糧折銀
請畱二萬兩賑濟兗東二府窮民庶得生活
其萊登二府地瘠民疲生計益窘兼值
防倭修守諸費倉庫空虛委難措處且
明春防汛南北兵將聚集海濱值斯米

珠薪桂之時尤應預爲足食之計乞將
經略所糴遼餉盡數

奏畱一則爲煮粥放賑之用以濟萊登災
民一則爲行糧月餉之需以資各兵防
倭支食伏候本院裁奪具

題等因呈詳到臣先該臣看得所屬災重
民疲責成有司正官多方拯恤又恐各
官虛文塞責民不霑惠行委分守濟南

道右叅政汪應蛟分守海右道右叅政
沈九疇東兗道缺官委糧儲道左叅政
王士性海防兵巡道副使徐成位徧詣
郡邑逐一稽覈酌量倉庫盈虛查理災
民多寡分村煮粥分等放賑或行平糴
或借子種區處明確具冊詳報續據各
道議報前來凡可委曲調停臣卽權宜
措處拯恤去後今據前因臣會同按臣

議照山東今歲水災重大西三府兗東
爲甚濟次之東三府萊登爲甚青次之
閭閻凋瘵民不聊生仰荷

皇上洪慈改折蠲恤民困稍甦近復

嘉納部科之議憫念兗東行臣議處

嘉惠元元

恩至渥也

臣

叨有撫綏之責敢不奉揚

德意悉心查議先是臣督行各道分府親歷

查核區處詳報臣酌量議

請以故不敢遽行

題復今據查報兗東二府州縣當水下流
渰沒最慘老稚仳離日拾草子刮削樹
皮以充口食雖經撥括倉庾煮粥放賑
但人多粟少厯支目前來春青黃不接
生計益艱無告窮黎枵腹待斃殊可惻
憫臣欲議截漕糧平糴顧恐改折數多

國儲難損又貧民無銀可糴終未蒙

恩欲多

請內帑賑濟又念司農告匱不敢取盈再三

籌度

請於本省漕折糧銀內量畱二萬兩分發充
東二府查賑極貧災民以延旦夕之命
數不加多而惠可溥濟似爲便益臣伏
覩江北河南等處或發漕糧或畱改折

動數萬計臣所

請者不過彼中之一二耳竊諒

皇仁必所不靳也至於萊登二府沿海蕭條
災傷尤重見今斗米三錢十室九空棄
妻鬻子載道啼號人情沟沟非破格賑
施疲悍之民恐生意外且來歲防汛兵
集海上萬口待炊無米接濟脫巾可虞
所幸遼餉停運若天降殍民欲眈眈日

望此米爲存活計矣設議平糴還價則
垂死貧民何銀告糴若欲官帑取償則
備兵放賑接括已盡臣竊惟

朝廷軫恤外邦不難捐金運餉遠爲救濟
而况中原赤子窮苦至極卽以本地所
糴買者就濟本地之急諒亦

皇仁之所不靳也旣經司道查議前來輒敢
冒昧具

請伏乞

皇上軫念民艱

勅下該部再加覆議上

請合無將本省改折漕糧銀內量畱二萬兩
分發兗東二府被災州縣或買米煮粥
或分銀賑濟如法散給俾霑實惠造冊
報查其見囤萊登二府原糴運遼米豆
免其還價容臣動支一半賑濟災民照

充東煮賑事宜給發報核一半畱給來
春防汛各兵支食庶民生可資全活地
方亦保無虞矣夫行臣議處本爲充東
而臣兼以萊登

請所議本賑貧民而臣兼以兵食

請實爲東西六郡俱係

皇上赤子

天恩一視豈忍使之向隅臣據實陳乞無非

廣

皇上浩蕩之仁爲災萌更生之計而已至於
兵食一節更有可言者蓋自去歲倭警
以來召募新兵加餉一十六萬民間已
不堪命今歲災傷重大各項錢糧俱荷
蠲停多方拯救之不暇尚忍派徵以重其困
乎顧兵不可一日缺食則餉一日不可
不處臣極力籌維尚無計策故敢議

請遼米一半以少濟萬一餘者當再行區處
議

請蓋兵餉措置一分則疲民免一分之徵派
亦部科議處之一意也伏惟

皇上垂察臣下情不任激切懇祈之至謹題
請

旨

繳賑煮銀粟疏

奏臣據山東布政使司呈准守巡兵備等道咨牒造送散賑煮粥救濟過

魯府貧宗并濟兗東青萊登六府所屬被災州縣衛所士庶軍民人等用過

欽賑等銀并支過本處倉庫錢糧數目文冊到司查得節蒙案發

欽賑銀四萬兩

內宮賑銀一萬一百兩秤出附餘銀六兩

三錢

欽定捐助賑銀三千兩戶部題畱太倉草銀
二萬兩漕折銀二萬兩兩院題畱漕折
銀二萬兩遼餉米豆三萬六千七百玖
十五石九斗九升零比因煮粥米不敷
又於題畱充餉臨德二倉米五萬石內
動支一萬九千三百五十三石三斗及
本省各府州縣庫貯各項官銀并兩院

俸廩贖銀一萬九千七百一十二兩

六錢七分七釐四毫零銅錢五十萬八

千九百九十九文預備倉穀四十二萬

一千五百三十二石七斗五升七合八

勺零米豆雜糧二萬五千七十四石七

斗五升三合令義民輸賑銀四百一十

八兩五錢一分米穀雜糧四千二十八

石五斗四升于前賑銀內動支二萬六

千二百八十五兩八錢二分六釐零糴
買米穀雜糧三萬六千二十八石八斗
四升七合俱煮粥支用訖總計賑濟過
魯府貧宗壽星觀爨等九百七十四位賑
銀二千兩穀二百三十六石儒學貧生
軍民人等極貧一百二十五萬四千七
百一十五名各賑銀錢米穀不等共銀
六萬八千四百一十兩六錢七分一絲

銅錢七萬九百八十三文米穀雜糧三十二萬八千二百八石三斗六升八合零次貧八十九萬二千六百六十六名各賑銀錢米豆不等共銀三萬九百七十五兩八錢九分四釐零銅錢四十萬一千五十七文米穀雜糧一十四萬二千七百二十六石五斗一升九合零食粥饑民四百一十八萬七千八百二十

一名口共用過米穀雜糧一十七萬一
千六百四十三石三斗一升零銀五千
五百六十五兩九分六釐零銅錢三萬
六千九百五十九文各數目俱已明白
軍民咸霑實惠并無別弊其煮粥用過
臨德倉米一萬九千餘石伏候一併俱
奏開銷等因造冊呈報到臣該臣會同按
臣看得東省災重民困萬口嗷嗷荷蒙

皇恩浩蕩破格蠲賑臣等仰承

德意以銀粟散給待炊之民以米粥收食垂
斃之民督行各道分地巡查有司親身
周核一時災萌多獲更生遍地懽呼仰
祝

聖壽于億萬載臣等遵將救荒官員分別賢
否具

題勸懲外所有有用過錢糧臣等覆加查覈

冊開節發

內帑并臣題畱及動支本處倉庫銀粟總
計賑濟煮粥共支用過銀一十三萬三
千二百三十七兩四錢八分七釐零內
除支銀二萬六千二百八十五兩八錢
二分零買米煮粥外實散過銀十萬六
千九百五十一兩六錢六分零銅錢五
十萬八千九百九十九文粟穀米豆雜

糧五十四萬二千八百一十四石零煮
粥賑救濟過極貧次貧宗儀生儒軍民
人等共六百三十三萬六千一百七十
六位名口節查明確委無虛冒等弊所
據各項錢糧及煮粥用過臨德倉米一
萬九千餘石相應一併開銷擬合

奏報今將造完賑煮支用過前項宗民花
名銀粟數目文冊進

繳謹具奏

聞

由庚堂集卷之二十三終

由庚堂集卷之二十三

二十五